

# 1001 Masalah

Abu Al-Mokhtar Sedia Menjawab



**Al-Shaykh Abdul Qadir al-Mandili**

**dan Kitabnya**

**yang telah heboh diperkatakan di dalam akhbar**

**(5)**

Bagi menjawab pertanyaan saudara Saleh bin Muhammad

Ali, Seremban, tentang kandungan kitab ((Beberapa Mutiara

Yang Bagus Lagi Indah)) karangan *Faḍīlah Al-Shaykh*

Abdul Qadir al-Mandili, guru di Masjid al-Ḥarām Makkah

al-Mukarramah, kita sajikan di sini satu masalah lagi

yang telah dihuraikannya dalam kitabnya itu.

## **Berkongsi dengan orang-orang kafir pada memerintah orang-orang Islam**

Satu masalah lagi telah disajikan oleh *Faḍīlah*

Al-Shaykh Abdul Qadir al-Mandili di dalam kitabnya itu seperti

berikut:

Apa hukum orang-orang Islam berkongsi dengan orang-orang kafir pada memerintah orang Islam di dalam negeri yang agamanya rasmi agama Islam, misalnya orang kafir dilantik jadi menteri, atau jadi wakil rakyat dalam Parlimen, atau jadi Gabenor atau lainnya?

Tatkala menjawabnya beliau menulis:

Tiada harus orang Islam berkongsi dengan orang kafir pada memerintah orang-orang Islam di negeri Islam,

sama ada kafir itu kafir *Dhimmī*, atau kafir *mu'āhad*, atau kafir *Harbī* atau lainnya. Bahkan wajib pemerintah di dalam negeri Islam itu tersusun daripada orang-orang Islam sahaja.

Haram atas orang-orang Islam melantik orang kafir untuk menguruskan sesuatu urusan pemerintahan orang-orang Islam, seperti menjadi menteri dan gabenor, dan wakil rakyat dan lain-lainnya.

Tentang ini, Al-Shaykh Ali Al-Shibri Amlasi berkata di dalam *ḥāfiyyah* bagi (*Nihāyat al-Muhtāj*) juzuk yang ketujuh, muka 387:

*"Aqūla: Wa kadhā yuḥramu naṣbuhu (ay al-Kāfiru) fī shay'in min umūri al-Muslimīn."*

Ertinya: “Aku berkata: Dan demikian juga haram mendirikan (melantik) orang kafir pada menguruskan sesuatu daripada segala urusan (pemerintahan) orang-orang Islam.”

Lebih tegas lagi, Allah ‘Azza wa Jalla telah berfirman: *“Yā ayyuhā al-ladhīnā āmanū lā tattakhidhū al-Yahūda wa al-Naṣārā awliyā ba 'dūhum awliyāu ba 'dīn wa man yatawallahum minkum fa innahu minhum inna allāha lā yahdī al-qawma al-zālimīn.”*

Ertinya: “Wahai orang-orang yang beriman, jangan kamu menjadikan orang-orang Yahudi dan Nasara pemerintah, kerana setengah mereka itu (sesuai – P.) memerintah akan setengahnya yang lain. Dan barangsiapa dari antara kamu menjadikan mereka pemerintah, maka sesungguhnya ia daripada mereka, bahwasanya Allah Ta‘ālā tiada menunjukti akan orang-orang yang zalim.”

Apabila tiada harus menjadikan Yahudi dan Kristian pemerintah atas orang-orang Islam, maka ketidaan harus menjadikan orang kafir yang menyembah berhala pemerintah atas orang-orang Islam itu diketahui akan dia

dengan jalan lebih utama (*min bābūn awlā*).

Ibn Abbas berkata ketika mentafsirkan firman

Allah Ta‘ālā (*fa innahu minhum*): “Maka bahawasanya adalah ia daripada golongan mereka itu pada hukum kufur.”

Al-Zamakhsharī berkata di dalam tafsirnya “Al-Kashshaf”:

Adapun ayat suci ini (*wa man yatawallahum minkum fa innahu minhum*, erti: Dan barangsiapa dari antara kamu menjadikan mereka – golongan kafir – itu pemerintah), bahawa Allah Ta‘ālā memberatkan dan mengeraskan wajib menjauhkan orang-orang kafir dan mengasingkan mereka.

Sebagaimana sabda Rasulullah *sallā Allāhu ‘alayhi wa sallam*: “*Lā tarāa nāru humā*” erti: Wajib berjauh-jauhan antara orang-orang Islam dan orang-orang yang menyekutukan Tuhan, dengan sekira-kira kedua-dua pihak menyalakan api maka tiada melihat salah satu pihak akan yang lain. Hadith ni diriwayatkan oleh Abū Dāwud dan al-Nasā’ī daripada Jarīr *raḍīy Allāhu ‘anhu*

Di dalam *ḥāshiyah* al-Kāzarūnī yang menghuraikan tafsir al-Bayḍāwī, ada disebutkan hadis Rasulullah *sallā Allāhu ‘alayhi wa sallam*:

“*Anā barāa min kulli muslim maā mushrik.*”

Ertinya: “Aku berputus sama sekali daripada tiap-tiap orang Islam yang beserta dengan kafir mushrik.”

Di dalam ((tafsir Ibnu Kathīr)) ada disebutkan hadis Rasulullah *sallā Allāhu ‘alayhi wa sallam*:

“*Lā tasqiyāt bi nāri al-Mushrikīn.*”

Ertinya: “Jangan kamu mencari terang daripada Cahaya api orang-orang mushrik.”

Hadis ini telah ditafsirkan oleh Imam al-Hassan al-Basri dengan katanya:

“*Lā tastashīru al-Mushrikīn fī umūrikum.*”

Ertinya: “Jangan kamu meminta fikiran orang-orang mushrik

mengenai urusan kamu.”

Semuanya ini, kata *Faḍīlah* Al-Shaykh Abdul Qadir

al-Mandili, menjadi dalil bahawa tiada harus orang-orang kafir yang menyembah berhala dijadikan anggota Parlimen (Dewan Perwakilan Rakyat) di negeri Islam.

Di dalam hadis, yang diriwayatkan oleh Abū Dāwud

daripada Samrah *raḍīy Allāhu ‘anhu*, Rasulullah *sallā Allāhu ‘alayhi wa sallam* bersabda:

“*Man jāma‘u al-Mushrik aw sakanun ma‘ahu fa huwa mithluhu.*”

Ertinya: “Barangsiapa berhimpun dengan kafir mushrik

atau tinggal setempat bersama-sama dengannya maka ia adalah sama sahaja seperti dia.”

Di dalam kitab ((Sunan Abū Dāwud)) (Juzuk 4, muka

178-179) daripada Abū Hurayrah *raḍīy allāhu ‘anhu*, bahawa Rasulullah *sallā Allāhu ‘alayhi wa sallam* bersabda:

“*Al-Mar‘u ‘alā dīni khalīluhu falyanżur aħadukum man yukħālil.*”

Ertinya “Seseorang itu ialah atas agama sahabat

karibnya, maka hendaklah seseorang kamu melihat baik-baik akan orang yang dijadikan sahabat karib itu.”

Al-Qurṭubī pula berkata ketika mentafsirkan ayat

“*La tattakhidhū bi ḫānatan min dūnikum*” (Ertinya: Jangan kamu jadikan sahabat karib akan orang lain daripada golongan kamu): Telah melarang oleh Allah ‘Azza wa Jalla akan sekalian orang-orang yang beriman, dengan ayat ini, daripada menjadikan orang-orang kafir dan Yahudi dan sekalian yang mengikut hawa nafsu (ahli Bid‘ah) tempat meminta fikiran mengenai segala urusan mereka, dan jangan meletakkan urusan orang-orang Islam di tangan orang kafir dan ahli-ahli Bid‘ah yang tersebut.

Tatkala Abū Müsa al-Ash‘arī melantik seorang

Nasrani (kafir *Dhimmī*) menjadi keraninya, Saiyidina ‘Umar

(yang menjadi khalifah pada masa itu) pun menegurnya

dengan berkata:

Jangan kamu muliakan mereka (orang-orang kafir), kerana mereka telah dihinakan oleh Allah, dan jangan kamu mempercayai mereka, kerana mereka telah dibangsakan kepada khianat oleh Allah, dan jangan kamu menghampirkan mereka, kerana mereka telah dijauhkan oleh Allah!

Di dalam kitab tafsir (*(Al-Bāhr)*) karangan Abū Ḥayyān, pada tafsir ayat “*La tattakhidhū al-Kāfirīna awliyā’*” (Ertinya:

“Jangan kamu menjadikan orang-orang kafir itu pemerintah”)

Ada disebutkan:

Ayat ini menjadi dalil bahawa orang-orang kafir tiada berhak memerintah atas orang-orang Islam, dan bahawa tiada boleh menggunakan orang-orang kafir *Dhimmī* untuk menguruskan sesuatu urusan pemerintahan orang Islam. Bahkan orang-orang kafir itu tiada berhak meemerintah anaknya sendiri yang telah memeluk Islam, apalagi orang-orang Islam yang lain.

Lebih lanjut *Faḍīlah Al-Shaykh Abdul Qadir al-Mandili* berkata:

Adapun golongan yang mengharuskan orang-orang Islam berkongsi dengan orang-orang kafir pada memerintah orang-orang Islam di negeri yang agamanya yang rasmi agama Islam, dan mengatakan sah orang-orang kafir di Tanah Melayu menjadi menteri memerintah orang-orang Islam, dan menamakan kafir-kafir yang di Tanah Melayu itu kafir-kafir (*(Mu ‘āhadīn)*), maka pendapat mereka yang tersebut adalah salah, kerana tidak ada dalilnya, bahkan segala dalil menunjukkan tentang haramnya menjadikan orang-orang kafir memerintah atas orang-orang Islam. Dan juga kerana sekalian ((kafir *Wathnī*) (penyembah berhala) seperti kafir-kafir yang di Tanah Melayu itu tidak sah dijadikan ((Kafir-kafir *Dhimmī*)), apalagi dijadikan menteri dan gabenor

serta wakil rakyat di Parlimen, kerana syarat bagi

((kafir *Dhimmī*)) itu bahawa mereka mempunyai kitab seperti Yahudi atau ((*Shubhah kitāb*)) (kitab yang masih diragukan tentang ada atau tiadanya) seperti Majūsī. (kafir dari kalangan orang Farsi – P.)

Tambahan lagi, perbuatan orang-orang Islam berkongsi dengan orang-orang kafir pada memerintah orang-orang Islam itu Bid‘ah *Dalālah* (Bid‘ah sesat), tidak dilakukan pada masa hidup Nabi *ṣallā Allāhu ‘alayhi wa sallam* dan khalifah-khalifah Islam – Al-Khulafā’ Al-Rāshidīn. Alim ulama tiada haruskan mendiamkan diri membiarkan perkara ini.

Adapun ayat-ayat Qur'an, yang dijadikan dalil oleh golongan yang tersebut, tentang sahnya orang-orang kafir *Wathnī* (penyembah berhala) di Tanah Melayu menjadi menteri-menteri yang memerintah orang-orang Islam iaitu ayat-ayat:

“*Wa mā arsalnāka illā rahmatan lil ‘ālamīn.*” (107, *al-Anbiyā’*).

(Ertinya: dan tiada kami mengutuskan engkau – Ya Muhammad – melainkan untuk menjadi rahmat bagi seluruh alam. – P.)

“*Yā ayyuhā al-nāsu innā khalaqnākum min dhakarīn wa unthā wa ja ‘alnākum shu ‘ūban wa qabāila li ta ‘ārafū.*” (13, *Al-Hujurāt*).

(Ertinya: Wahai sekalian manusia, sesungguhnya kami telah menjadikan kamu daripada lelaki dan perempuan, dan kami telah menjadikan kamu berbangsa-bangsa dan berpuak-puak supaya kamu berkenal-kenalan. – P.)

“*Wa inistanṣarūkum fī al-dīni fa ‘alaykumu al-Naṣru illā ‘alā qaymi baynakum wa baynahum mīthāqun wa Allāhu bi mā ta ‘malūna baṣīr.*” (72, *al-A‘rāf*).<sup>1</sup>

(Ertinya: Dan jika mereka meminta tolong kepada kamu dalam perkara agama, maka wajiblah atas kamu

<sup>1</sup> Kesalahan surah. Surah yang sebenarnya adalah Surah al-Anfāl.

menolong mereka, kecuali terhadap kaum yang ada perjanjian antara kamu dengan mereka, kerana Allah melihat akan apa yang kamu kerjakan. – P.)

Iaitu dali-dalil yang tiada sah, kerana ayat-ayat yang tersebut tidak ada bersangkut paut dengan perbuatan menjadikan orang-orang kafir itu pemerintah dan menteri, maka tiada bersetuju dalil dengan *madlūl*, bahkan jauh panggang dari api.

Demikian juga tentang golongan yang tersebut, berdalil dengan tawarikh negeri Islam seperti negeri Sepanyol, maka ia tidak juga sah, kerana dalil-dalil itu hanya sanya empat sahaja: Qur'an, Hadith, Ijmak dan Qiyas.

Istimewa pula orang-orang kafir di negeri Sepanyol

itu ialah bukan kafir *Kitābī*, bukan kafir *Wathnī*, maka tiada sah diqiyaskan kafir *Wathnī* atas kafir *Kitābī*.

Pendeknya golongan yang tersebut tiada suci daripada dua perkara, pertama mereka tidak mengetahui akan haramnya perbuatan berkongsi itu, maka yang demikian itu ialah kejahilan, kedua mereka mengetahuinya tetapi mengharuskan perbuatan yang salah satu itu kerana menyokong parti mereka atau kerana tujuan yang lainnya.

Keterangan yang lebih lanjut, dapat dibaca dalam kitab saya yang bernama (*(Islam: Agama dan Kedaulatan)*).

Demikian pati huraiyan *Faḍīlah Al-Shaykh Abdul Qadir al-Mandili*.

## **Shaykh Abdul Rahman Shibli Sarawak Shaykh Haji di Makkah al-Mukarramah**

**(Telegram: Shibli Makkah)**

**(Peti surat nombor 188)**

Sedia menyambut dan menjaga segala urusan saudara-saudara di Makkah, di Madinah, di Arafah dan di Mina dengan sepenuh-penuh puas hati. Tambang dan apa-apa perbelanjaan menurut apa yang ditetapkan oleh kerajaan Saudi 'Arabiyyah, yang sentiasa memelihara keselamatan, kesihatan dan kesejahteraan sekalian saudara yang mengunjungi tanah suci, yang sedia teratur perhubungan secara *modern* dengan belanja yang murah.

Bershaykhlah dengan Shaykh Shibli yang berdekatan dengan Masjid al-Harām.

Berhubunglah dengan wakil kita:

HAI AWAD BIN JA'AFAR  
115-1 Minto Road,  
Singapore, 7.

AHMAD MUSTAPHA AL-EDRUS  
Jalan Haji Mataim,  
Kuching, Sarawak

Atau kepada:

A.H EDRUS  
356/8 Geylang Road,  
Singapore, 14.

Yang akhir ini akan bersedia memberi dan petunjuk-petunjuk kepada orang-orang haji yang akan berShaykh dengan Shaykh Abdul Rahmann Shibli Sarawak.